





MGA KASALUKUYANG BONIFACIO *ni Mirasol*

Noong unang nilupig
ang musmos na Inang Bayan,
ilang panahong tumindig
ang armadong himagsikan.

Lulan ang kasarinlan
mula sa mga sandata,
buong tapang na pinaglaban
ang pag-ibig sa tinubuang lupa.

Hindi pinanganak ang isang bayani
upang magapi sa digmaan.
Sa prinsipyong pinagtagpi-tagpi,
nagbubuklod ang kasaysayan.






Nag-aalab ang aktibismo
sa mga kasalukuyang Bonifacio.
“Ang tao, ang bayan,
Ngayon ay lumalaban!”

Tangan ang balatengga’t polyeto,
laban sa abusadong gobyerno,
gawing daan ang lansangan
upang maitambol ang mga panawagan.

Isigaw ang pagmamahal
tulad ng palahaw sa Pugad Lawin,
kalasin ang pagkakasakal,
at ang mga sedula’y punitin!



SUPREMO

ni Aaraw Rin

supremo, marahil nga'y totoo:
mapanlinlang ang mundo.

at ika'y dakila lamang
sa pagsasaulo

ngunit ika'y naglalaho
sa pagsasapuso.

subalit, supremo, nauunawaan ko:
ang pag-ibig ay marahas.

at ang umiibig nang wagas
ay tiyak na masukal ang landas.


at ang lupang tinubua'y inaagnas,
ilahas sa ating mga swelas,

kung kaya't, supremo, naniniwala ako:
ang bayan mo'y hindi mangmang.

ito lamang ay walang muwang
sa mga makapangyarihang humahawi,

sa kaniyang mga kagubatan,
sa kaniyang mga kabundukan.

marahil nga'y totoo, supremo:
marahas umibig ang bayan mo.





ANG KULTURA

ni Aplaya

Kung sa tuwing may problema'y
nangangating maglabas
ng iyong saloobin,
Ito'y iyong gawin at katapangan
ay doblehin sa bilang ng bituin.
Katapusan na ng panahon
ng mga kakabakabang lakas
Dahil nasa kultura mo ang pag-aklas.

Kapag nahaharap sa peligro't
nauuna mo pang alalahanin ang katabi mo,
Panalangin kong ang emosyong ito'y
sa kasaysayan ay mag-iiwan ng bakas
'Pagkat nasa kultura mo ang pag-aaklas.

Tuwing ang kabutihang-tao mo'y
sinusuklian ng kahibangan,
Kasakiman, kabalbalan,
at pinagplanuhang kabiguan,
Tanganang mabuti ang sukling
hindi kayang yapusin
ng pitaka't masdan:
Nasa kultura mo ang pag-aaklas.



At sa panahon ng pagkadesperado,
Kung kailan parang hindi na kayang
alalayan ng mundo ang pagluluksa mo,
Laliman ang iyong pagdama't
alalahanin ang sistemang nagbubunga
Sa kulturang saklaw ang pag-aaklas.





Ang UPLB Writers' Club ay isang sosyokultural na organisasyong binubuo ng mga baguhang manunulat. Itinatag noong 1972, ang organisasyon ay patuloy na kumikilos upang magsulong ng malay at makabuluhang akdang pampanitikan sa loob at labas ng pamantasan.